

# Editorial

Liebi CCBlerinne, liebi CCBler!  
Au das Johr isch dr Friehlig doch no ko, wenn au mit grosser Verzögerig. Alles isch jetzt grien und blycht. Vor e paar Wuche Afang März het s no ganz anders usggeh. Schnee wie scho lang nümm hets gä, und d Lüt sin am Latärnesunntig nit sicher gsi, ob me d Fasnacht überhaupt ka durefiehre. S Fasnachtscomité het sich maximal für unseri Fasnacht engaschiert. D Hauptfasnachtsroute sin denn am Morgestraich vo däm vyyle Schnee befreyt gsi und au dr Cortege het me könne normal durefiere. E härlige Dangg an all die vyyle Schneewägruumer!

In däre Usgob findet Ihr vo alle Garde ihre Fasnachtsruggbligg und dr Bummelbricht. Mir könne nomoll in de Bilder schwelge. Dr Stammverein isch am Drummeli mit eme tradizionelle Ufftritt drby gsi. Do drzue könnet ihr läse, wie me zue däm stimmigsvolle Ufftritt ko isch.

Mir fiehre au e Klatsch-Spalte in unserer Zytig. „Hesch gwüsst ass“ haisst si und wird ab dere Usgob vom Cesi Schmidli als frey schaffende Redaggter betreut. Dr Cesi findets super, wenn Ihr Euch bi ihm mäldet mit de neuschte Gschichte, wo so ablaufe bi de Lüt in unserer Glygge.

Jetzt simmer scho syt e paar Wuche in dr CCB-loose Zyt. Für a paar vo uns isch das e bitz e haimatlosi Zyt. Aber nit jommere! Mir hän e grössers Fescht vor uns: am Bündelitaag-Wuchenänd sin mir drby am Eidgenössische Drummel- und Pfyfferfescht. E schöne Friehlig mit vyyl Wärmi und Sunneschyn winscht Euch

...eiri Redaggtere

## s Clique-Organ vom Central Club Basel

### D Fasnacht 2006 – S git als wie MEER! Ob Wy, ob Schnee oder Räge – Blub!



S git als wie MEER z Schufle!  
Am Moorge für d SBB  
und Zoobe für dr CCB!



## Inhalt

|             |          |
|-------------|----------|
| Stammverein | Sytte 2  |
| Jungi Garde | Sytte 10 |
| Alti Garde  | Sytte 14 |
| Intärns     | Sytte 17 |
| Allergattig | Sytte 18 |
| Die Letscht | Sytte 20 |

Geht an alle Mitglieder des Stammvereins, der Jungen Garde und der Alten Garde

# Stammverein

**Dr Uffdrift vom CCB am Drummeli 2006  
oder: Äi Mol mehr e suuberi Punggtlandig...**



Y muess zwor zuegäa, ass y no nie im Lääbe Fallschirm gsprunge bi, aber trotzdem möcht y dr Uffdrift vom CCB Stamm am Drummeli 2006 mit eme Fallschirmabsprung verglyche. Um s vorwägg z näa: Unsere Uffdrift isch e suuberi Punggtlandig gsii – äi Mol mehr und in gwohnter unschlagbarer CCB-Manier. Soll häisse: Mer hän s wiider e Mol uff e Punggt aanebrocht...

S ganz Projäggt hätt bekanntlig ursprünglig sonne e Kunschtsprung wärde. Me het scho im Frieleg 2005 disgutiert und beschlosse, mit em Tschäss-Stügg „Take five“ uff dr Drummeli-Bühni z lande. E Sprung uss schwindelerregender Höchi , e ambizionierti Kischte wo vermuete loo het, ass dä Sprung

uss ere Höchi stattfindet, wo jedi und jede an die physische – sprich: musikalische – Gränze bringt. Me mungglet, s het sogar Lüt gäa, wo vor luter Höheangsch vor däm Projäggt uff Australie gflüchtet sin. Und tatsächlig – mer wüsse s – isch d Luft denn au immer wie dünner worde, so dünn, ass letschtändig dr „Take five“-Pfuus ussgange isch. Me het – relativ spoot scho im Joor – beschlosse, mit em Stadtpfiffer unter em Motto „Wie friehner“ dä (Höhe-) Flug neu z starte und e souveräni, im klassische Stil ghalteni Landig uff d Drummeli-Bühni z setze. E Konzäpt, wo nadierlig verhebt und im Nnochhinein definitiv verhebt het. Also het jede sy klassische Fallschirm an Ranze ghängt und so sin mer gstartet. S



wär aber nit dr CCB, wurd me sich s Lääbe äifach loo. Mer hän also doch no dr Närveküzel gsuecht und kurzerhand äi Värs im Stadt-pfiffer neu gschriibe. Denn was wär e Fallschirmabsprung ohni Räschtrisiko (um bi däm Bild z blybbe)? Ob allerdings die bräiti Publikumsmasse die Gabrioole in dr Luft überhaupt wohergnoo het, isch ungläert.

Nach änige instruggtermässige Härzinfärgd sin mer denn sowyt gsii, dr Sprung uff d Bühni z wooge. (Mer hän nadierlig miesse; schliesslig isch s Drummeli los-gange.) Y wurd saage, mer hän mit unserem speggdaguläär unspegg-dagulääre Uffdrift e gueti Falte gmacht: Als letschti Nummere hän mer im Charivari-Goschdym und mit Kopfladärnli s Publikum in Morgesträich-Stimmig versetze und d Lüt uff d Fasnachts-Wolge-Siibe setze könne. Das het au d Präss entsprächend goutiert (wenn me im BaZ-Artiggel gmergt het, ass dr folgendi Abschnitt mit em

## Impressum

### Redaktion

Ursi Nüesch  
Bierastrasse 31  
4103 Bottmingen  
Tel. P: 061 361 02 50  
ursi.nueesch@bluewin.ch

### Layout / Satz

Pascal Müller  
Tel. G: 061 721 04 70  
ADOBE Indesign (Mac OS X)  
alle Grafik- und Text-Formate

### Auflage

500 Exemplare

### Druck

Druckerei Dietrich AG  
Pfarrgasse 11  
4019 Basel

### Papier

100% chlorfrei gebleichtes  
Papier ohne optische Aufheller

### Adressberechtigungen

Andreas Künstle (Sekretär)  
Güterstrasse 158  
4053 Basel  
Tel. 061 681 16 06  
andy.kuenstle@bluewin.ch

### Beiträge

Michi Bürgin  
Sandro Waser  
Zahngaischt  
Piccolo  
Andi Cheese Meier  
Cesi Schmidlin  
Ursi Nüesch

**Redaktionsschluss**  
CCB Zytig Nr. 229  
15.August 2006

# Stammverein



CCB nüt me z tue het). Dr druuri Zuefall het s welle, ass in dääre Zyt dr René Brielmaa gstorbe isch und unsere Uffdrift somit no zer Hommage an Komponischt vo däm schöne Marsch worde isch. Übrigens het dr CCB vor äniger Zyt dr Stadtpfiffer am Drummeli urufffiehrt.



D Drummeli-Wuche isch für alli e prächtigi Vorfasnachts-Zyt gsii mit beschter Stimmig in de Glygge-Räihe. Mer hän voll dr Blausch kaa! – jedefalls nachdäm mer jewylys dr 7. Värs bi de Pfiffer bzw. dr 9. Värs bi de Dambuure „überläbt“ hän. Was bsunders Freud gmacht het, isch d Presänz gsii vo unserem Personal. Ass me dr CCB im Drummeli-Fasnachts-Himmel überhaupt gseht, muess dr Hinterscht und Letscht uff d Bühni. Das isch quasi e so gsii. An dääre Stell e grosse Applaus und e riise Danggschön an alli! Das isch grossartig gsii! Y wott nit wüsse, wie vyl dehäm dr Huussääge uff s Spiil gsetzt hän, um praggtisch immer zmitzt in dr Nacht mit dr



dr Alte Garde s ganz Joor duure. Prächtig!  
Wirglig toll isch denn no d Presänz gsii am Ständeli vom Mittwuch in dr Drummeli-Wuche, wo mer im Voll-Fasnachts-Wiggs im Käller zimmlig logger zimmlig vyl Gäld



verdient hän. Merci an alli, wo derby gsii sin!

Ass bi unserem – oder besser: nach unserem Uffdrift – dr CCB denn jeywyls uff dr Bühni no zem Central Chor Basel worde isch, wänn mer nit vergässe. Mit „z Basel an mym Rhy“ in gsungener Version hän mer dr Epilog vergoldet und mitgholfe, dr Schlussponggt unter s Drummeli 2006 z setze. Und äi Mol mehr het dr CCB sy Flexibilideet unterm Bewyss gestellt, hän mer doch quasi bis Mitti Wuche jewylys vo dr Regie e anderi Strophe-Aaornig misse adaptiere. Mit Bravour bestande!

„Wie friehner“: e Motto, wo uffgange isch. Mer hän d Lüt zem Däil e weeneli überrascht dermit. Das isch guet e soo. Me het vo Kritiker au ghört: „Vom CCB han y mehr erwartet!...“ Persönlig wärt y das Urdäil als durchuss positiv, well s kunnt uss dr Begäischterig vo unsere Uffdrift in vergangene Joore. An däm würde mer gmäss. Die disjöorigi Redimensionierig vom Uffdrift – ebbe „wie friehner“ – isch e glungeni Sach gsii. Allerdings bin y persöönlig dr Mäinig, ass mer in zwäi Joor wiider voll äine ablöön und dr Vogel wiider abschiesse wän und sonne – in welcher Form au immer!

acm




# Stammverein


CCB Zytig Nr. 228



Sytte 4



Das haben Sie und Ihr Auto verdient:  
EINEN PERFEKten SERVICE!



**Emil Frey AG  
Olympic Garage**


Brüglingerstrasse 2, 4002 Basel  
061 335 61 61, www.olympic-basel.ch

# Stammverein

CCB Zytig Nr. 228



Sytte 5



# Stammverein



CCB Zytig Nr. 228


Sytte 6

## Fasnacht 2006 – s git alls wie MEER!

Das Sujet het wirggliig guet passt an däre Fasnacht: s het allerdings nit numme alls wie MEER Wasser gä. S het nämmlig alls wie MEER gschneyt. Am Latärnesunntig hets in 12 Stunde öppe 60 Zentimeter Neuschnee gä. Und do drmit hämmer e Chaos gha, wie mes scho lang nümm gseh het in Basel. D Drämmli und d Büss sin im Schnee stegge blibe und die ganzi Stadt isch im Schnee versungge. Zum Latärne Yypfyffe het me z Fuess oder wie dr Christoph mit de Langlaufschli misesse ko. Mit dr Latärne het dr Tobi das Jahr super Massstäb gsetzt mit de Fisch und dr Freyhaitsstatue in MEER. D Conny,



e Walliser Fründin vo dr Sabine, het im CCB e sprützige Wysespendiert, MEERCI! Bim Latärne Yypfyffe sin mir scho e paar moll kräftig uff em Schnee usgrutscht.



Dr Morgeschtraich het trotz alls wie MEER Schnee tatsäglich stattfunde! D Stadtrainigung het alli Bagger vo dr Nordweschtschwyz uffbotte und d Hauptfasnachtsroute vom Schnee könne befreye. Chapeau und MEERCI! Mir hän die neue schmale Kopflatärnllyygweyt und hän herrlig durch die verdunggleti Innerstadt drumplet und pfylle.



Am Mäntig Nommitag simmet in Taucheraazüg, mit Suurstofffläsche und mit oder ohni Taucherbrülle bi dr Manor ufftaucht. D Taucherbrülle isch unseri Larve gsi, und



komischerwys isch die Brülle bi ainiige vo uns scho vor em Cortesch verlore gange. Und so hämmer mit e bitz gliechtete Raihe miesse am erschte Comité vorby zieh, d Monique het ihr rot Käppli ganz tief ins Gsicht zooge und später e Ersatzlarve unterwägs gschänggt griegt. Mir hän e sensationell schöne Tambourmajor gha: dr Kurt het si Job gnosse als U-Bootkaptän samt U-Boot vo 2 Meter Längi. Z Nacht hämmer wie allewyl im Hilton gässse, numme isch s Ässe kalt gsi und für e paar Gschiggi hets e zwaite warme Täller gä. Dr Fasnachtsmäntig hämmer mit eme Halt im CCB-Käller abgeschlosse.



CCB Zytig Nr. 228

Sytte 7

# Stammverein



CCB Zytig Nr. 228

Sytte 7



Fasnachtsmittwuch: es het alls wie MEER grägnet! Rägeschutz aa – ab – aa - ab und so wyter. S Wätter isch aifach gruuusig nass und kalt gsi. Ich ha mi irgendwenn uf mi Pseudo-Neopren-Taucheraazug verlo und ha dänggt, dä hebi denn s Wasser scho ab. Und irgendwie het das bi mir au verhebbt. Dr Passive Apéro hämmer neu im Hinterhof vo dr Gallerie Stampa könne gniesse, e super Idee. Trotz Räge



irgendwie isch dr Göttihalt sehr kurz usfalle, me het richtig miesse stresse bim Cola usdringge. Zum Barbara-Käller hindere hän mir uns noch Mitternacht verirrt, dä isch blöderwys zue gsi. Am Barfi hän sich denn alli wider gfunde, und so hets no für e paar Ründeli Gässle glängt. Trotz all däm vyle Räge isch dr Fasnachtsmittwuch schnäll verby gange. Mir hän obe am Spalebärg no ne Extraständeli unserem Dambourmajor Kurt gä und so Abschid vo dr Fasnacht 2006 gno.

UN



isch es sehr stimmigsvoll gsi und mir hän unser Gleesli ohne Publikum könne gniesse. Im Hilton isch dasmoll warm kocht worde und mir hän uns guet könne regeinerie und droggne. Es het wider alls wie MEER gschüttet, wo mir mit de Junge und den Alte die Frey Stross durab marschiert sin. Und



# Stammverein

CCB Zytig Nr. 228



Sytte 8

## Dr Bummel 2006

S isch immer e weeneli frie am Bummelsunntig-Morge. Und ass mir au das Joor glych mied ussgsee hän wie alli andere Joor, sin mir bereits uf die nüüni am Morge in Spärber bstellt worde. E Käffeli het denn aber alle Miede und ganz Miede uf d Bai gholfe. So hän mir e kurze Waggel dr Spalebärg duruff und über e Petis könne in Aagriff nä. Im Bernoullianum het bereits en erschte Apéro gwartet und het ys in die richtig Stimmig für dr kulturelli



Dail vom disjöörige Bummel brocht. Dr Heini Klauser alias Schorsch vHB2 und sy Gitarrischt dr Eric hän ys mit eme heerlige Vortrag e bombe Ybligg in s Wääse und in d Gschicht vom Schnitzelbangg gä. Zur Uffloggerig het dr Schorsch zwüscheduure immer wider e baar Bängg vorgsunge. Dasch jewyyls en aigenartige Momänt gsi. D Geestigg het me kennt. d Stimm het me kennt. Numme d Larve isch en anderi gsi. Sensationell! Dä fasnächtlig, kulturelli Vortrag vom Schorsch und em Eric het für en unglaublich glungene Aafang vom Bummel 06 gsorgt. Noch em Vortrag hän e baar gräischendi Görls ändlig d Mögligkeit gha, en Autogramm vom Schorsch z schnabbe. Alli andere hän nomol e kurze Apéro gno. Und zem die vom



lange Hogge ygschloofene Bai wider z wegge, sin mir denn gmietlig an d Schiffändi gloffe. Vo dört het ys dr Achter Richtig Glaihünige gfaare. Ganz in dr Nöchi vom Heini sym ehemoollige Spiilplatz git s e Baiz.



S Schifferhuus. Entsprächend em Bummelkonzept sin mir nadürlig genau dört aane. E unterhaltsami Bedienig hän mir gnosse am Disch, und gässe hän mir wie d Fürschte.



Isch wirgglig sau guet gsi! Als Supplément het s vo de Neue im Stamm e rassige Saggodo gä. Wunderbar! Und zer Verdaugig vom Ganze het ys dr Don Pedro mit verblüffender

Ballon-Gschtaltig und mischerösem Babyyr-Verfätze beydruggt. Für die, wo noni ganz verdaut gha hän, het s im Restaurant Schiff no e glains Verrysserli gä. Zerscht het aber no e Wältrekord miesse uffgschettelt wärde. Schaffe mir s, ass 68 Gleeser Jägermaischter in dr Domino-Manier in je e Glas Red Bull falle und denn zu Speed Boats mutiere? Nit ganz. UF 23 versänggti Gleeser sin mir im erschte Aalauf ko. Immerhin.



E Wältrekord hän mir denn aber mit dr Gschwindigkeit im Vertilge vo de Speed Boats gschaftt. Nomol: Immerhin. Denn isch aber fertig gsi mit Ummehogge und Verdaue. Noch ere kurze Drämmliart hän mir bim Gässle in dr Innerstadt dr Bummel wyter gnosse bis am zäani zoobe, wo denn dr Kurt zem letschte Mol als Dambuurmajor abgwungge het. Druffaabe hän mir d Fasnacht 06 vor em HoBa no e weeneli ussblämbberle lo. S isch e heerlige Bummel gsi das Joor, wunderbar glunge! Ai-fach prima.

cbs

# Stammverein

CCB Zytig Nr. 228



Sytte 9





## Fasnachtsruggbligg 2006

Am Sunndig vor dr Fasnacht hämmer uns wie jedes Johr bim glaine Klingetal zum Latärne-Ypfyff-Apéro troffe. Aber d Stimmig isch nit wie jedes Johr gsi. Es het nämmlig Schnee ka wie ich's in Basel no nie ggeh ha! Alli hänn diskutiert über dä userordendli Zuestand vo unserer schöne Stadt Basel und e paar hänn au scho Angscht ka, dass die Fasnacht e komischi wird. Uff jede Fall het im Stamm si Obama, dr Guido und au dr Latärnekünschtler Tobi e Red gschwunge und siehe da, während däne Rede sinn mehreri Schneebäll übers glaine Plätzli im Glaibasel gfloge. Au nochär, wo mr richtig Hotel Basel zoge sin, hets im Vortrab vo de Junge so ne Art „Wär-Trifft-Wäm-Mit-Eme-Schneeball-An-Kopf-Wettbewerb“ gä, d Zugsbeglaiter sinn vo däre Idee nadürlig hällbegaischteret gsi! Mir sinn marschiert, übers Brüggli, richtig Hotel Basel und hänn denn unseri prachtvolle Latärne ahnepfluumt. Wär het welle, isch no e paar Däller Spaghetti go ihnezieh, doch die Maischte sin langsam haimeszue gange, will me jo no mehreri Stund brucht het, bis me die Gletscherstadt Basel durchquert het. Und scho isches lang-



sam Mäntig worde. Und wenn s Mäntig wird, isch das aigentlig nie öbis Erfreulichs, me muess sich nämmlig wider go abfruschte, sigs in dr Schuel odr im Gschäft. Aber dä Mäntig isch natürlich öbis anders, das waiss jedes Kind. Es haisst nämmlig a däm Mäntig: Hütt isch Fasnacht, hütt isch Morgestraich! Punkt 4i het dr stolzi Tambourmajor vom Stamm, dr Kurt Spörri, si Stägge ind Luft gstreggt und het mit ganzer Kraft dr Morgestraich agsait. Alli zämme sinn mr gsi, die Junge, dr Stamm und die Alte. Alli zämme hämmer wunderbaari Kopflatärnli uff unsere Larve ka – nämmlig die neue vom CCB sälberbaute Flachlatärnli!

Mir sinn mit de klassische Märsch durch d Gasse zoge und alli hets gfreut, dass d Fasnacht „apiffe“ worde isch. Noch zwei Rieme hämmer uns denn vo de Erwachsene trennt und hänn is uffe Wäg richtig Gligkekäller zum Zmorge gmacht. 2 vo uns hänn gfunde, dass sis nit nötig hän, mit uns dr Morgestraich zverbringe und sinn – was ich sehr billig find - zum dritte Mol in Folg- erscht uffs Zmorge ko. Mir hänn alli Zmorge gässse und sinn denn gsterggt wider



uff d Gass. Denn isch es irgende molle 7i worde und die Maischte sinn wider haimegange go Schloftanke für die näggscste drey Dääg. Am Noomidag hämmer uns bi nit schlächtem Wätter vor em Globus troffe – in unsere Zugsgoschtüm nadürlig. Aber ACHTUNG! Näb de Loipe vo Basel tropfts vo de Dächer! D Lawinefohr isch durch s schöne Wätter uff erheblich gstiige und d Latärne het uff die anderi Strossesitte evakuiert würde miesse. Ich könnt jetzt no viili Details verzelle aber denne brüchte mr drey CCB-Zytige mehr, will nit alles Blatz het in Ainere. Mir hänn dr Cortège gnosse und sinn denn ungefähr uff die halb sibeni in Gligkekäller gange go Znacht ässe! Wenn ich mi do rächt erinnere, hets dört glaibi Rahmschnitzel mit Nüdeli gä. S Ässe isch wie immer voll digg gsi und es het uns allne gschmeckt. Jäo und denn simmer ussem Käller use gange und obe sinn ungfähr drey Lüt im Schnee glandet, e paar Schneebäll sinn gfloge und d Laag uff em Lysserschlachtfäld het sich für die Ussestehende dütlich verschlächteret. No de Fridensverhandlige zwüsche de baide kämpferisch gstimme Parteie, hämmr is uff e Wäg zum Gässle gmacht. Denne hänn mir die Alte droffe. Gnau ihr



ahnets scho: Die Alte uss der ALTE GARDE. Mir hänn e Rieme gmacht mitenand und mir Junge hänn die Alte ohne zwelle, gergeret, was d Stimmig nit grad ghebt het. Aber mir sinn s nägscht Johr gärn wider drbi mit euch, mir mien halt e bitz me mitenand rede und vilicht au enand e bitz entgege ko. Uff jede Fall häm mir denn allai wyter gmacht und sinn durch d Gasse zoge. Mir hännns glatt ka, s Wätter nomol e Rieme mit em Stamm gmacht und sinn denn allai none paar Runde go draie. Denn isch s 12i gsi, das haisst so vyl wie Fasnacht finito und mir hänn no unsere letschte Abschlussmarsch




gmacht. Trotzdäm Wätter isch s wie immer e sehr schöni Fasnacht gsi und mir sinn alli guet gstimmt haimegange. Zum Schluss kunnt wider mol e Dangg – nämlich an s Vreni, an Christian, an alli Zugsbeglaiter, an d Köch und an alli, wo dr Junge Garde für die Fasnacht gholfe hänn. Messi!

Michi Bürgin



## Dr Bummel 2006



D Wätterfee het uns an unserem Bummel am 26. Merz e ganz e scheene und warme Friejohrsdaag bschäert. Und so hämmer ys denn am Sunntig demorge am elfi bim Hinderusgang (oder isch es emänd dr Hinderyygang) vom Bahnhof SBB droffe. Vo dert simmer denn mit Guggemuusig-Gläng im Rugge zum Zolli däppelet. Noch däm d Dambuure d Drumle verstaut ka hän, hämer ys in zwai Dreyer-gribbli ydaile miesse. Mit Ryssblei und Froogebooge simmer duure Zolli gange und hänn brobiert mit meegligsch viil richtige Antworte ains vo de bigährte Scheeffli z ergattere. Bi dr Froog, ebs im Vivarium Piranha git, sin bletzlig e baar Problemlie uftaucht. Denn d Piranhas sin zue andere Fisch in e anders Beggi umgsiidlet worde und s Dumme isch gsi, ass sy die Kaibe dert noonii aagschriibe hän. Das het nadyrlich zue Missverständnis gfiert. Als richtigi Antwort het denn Jo und Nai zellt. Derno simmer alli zämme in s mindere Basel ibere, wo mer im Lamm e ganz e


Sandro Waser



## Fasnacht 2006 – Alt isch gail

### Samschtig

D Latäärne-Vernissage, wo ab de halter sibeni im CCB-Käller aagsait gsi isch, het är über riesigi Schneehüffe miesse stampfe. D Innerstadt isch aber vo dr wysse Pracht gruumt gsi und so het am vieri dr Morgestraich aagfange. Dr CCB mit neue Kopflatäärnli het guet usggeh. S Zmoorge im „Pfaue“ isch wie jedes Joor rychhaltig gsi. Mit Pfiffe und Drumme isch me denn durch Stadt gässlet. Alli sin natürlig gspannt gsi, wie e jede vo uns am Noomittag vor dr Glogge erschynt. Was do Ainigi für e Uffwand trieb hän - Champoo. Dr Cortège hän mir ohni Stau in unserm Teilstück abtschalpt und sin denn gege di sächsi zum Nachtasse im „Parterre“ erwartet worde. E gueti Idee frieh ässe und länger in d Nacht gässle. Vor em Hotel Basel hän mit denn so um die zähni dr Schlusspunkt gsetzt und fascht alli sin mir no in CBB-Käller uff e Schlummerdrungg.



### Mäntig

Bis e jede in dr Stadt im Hotel Basel gsi isch, het är über riesigi Schneehüffe miesse stampfe. D Innerstadt isch aber vo dr wysse Pracht gruumt gsi und so het am vieri dr Morgestraich aagfange. Dr CCB mit neue Kopflatäärnli het guet usggeh. S Zmoorge im „Pfaue“ isch wie jedes Joor rychhaltig gsi. Mit Pfiffe und Drumme isch me denn durch Stadt gässlet. Alli sin natürlig gspannt gsi, wie e jede vo uns am Noomittag vor dr Glogge erschynt. Was do Ainigi für e Uffwand trieb hän - Champoo. Dr Cortège hän mir ohni Stau in unserm Teilstück abtschalpt und sin denn gege di sächsi zum Nachtasse im „Parterre“ erwartet worde. E gueti Idee frieh ässe und länger in d Nacht gässle. Vor em Hotel Basel hän mit denn so um die zähni dr Schlusspunkt gsetzt und fascht alli sin mir no in CBB-Käller uff e Schlummerdrungg.



### Mittwuch

Vo dr Uelistube sin mir so öppé am zwei am Nomidaag Richtig Claraplatz bim Comité verbii und hän dr erschi Halt in dr Wäbergass gmacht. S Wätter isch nit so toll gsi, denn es het ab und zue grägnat aber trotzdem hän mir s Comité am Stainebürg no aagloffe und sin denn im „Spielmaa“ go Znacht ässe. Dr gmainzami Marsch mit dr Junge Garde und em Stamm isch bi strömendem Rääge d Freye durabb gange. Will mir jo e Alti Garde sin, het is s Wätter nit so zum Gässle yglade und dr Schluss isch au no vor de zwölfe gsi. E glungeni Fasnacht isch es gsi mit Kostüm, wo jede sy Fantasie bim Sujet „Alt isch gail“ het sälber dörfe umsetze und es isch guet usekoo.

dr Zahngaischt



### JUSTIN UNTERNAHRER AG

Elektro- und Telefonanlagen  
Reparatur-Service  
Beleuchtungskörper und Haushaltgeräte



Hegenheimerstr. 97  
4055 Basel  
Tel. 061/382 72 72  
Fax 061/382 72 78  
email@untenaehrer-ag.ch  
www.untenaehrer-ag.ch  
vor dem Hause

### Die Brasserie mit Pfiff

  
ZUM BRAUEN MUTZ  
Barfüsserplatz 10  
CH-4051 Basel  
Tel. 061-261 33 69  
Fax 061-261 13 23  
Alfred und Ruth  
Rückhoff-Burkhardt  
vor dem Hause



Architekturbüro Linus Marti  
  
Dornacherstr. 210 4053 Basel  
Telefon/fax: 061/ 331 11 01  
  
Privat: Bruderholzstrasse 106  
4053 Basel  
Tel.: 061/ 361 87 42



Die gmietigli Baiz  
z' mitts in dr Altstadt  
  
Im 1. Stock  
z' hämeliige Lokal  
zum feyn ässe



Lischer  
ALLROUND-MARKETING  
Tel. 079 644 44 85  
Fax 061 483 17 28  
info@lischer.ch  
  
Für kleine und mittlere Unternehmen bieten wir:  
**ALLES!**  
  
[www.lischer.ch](http://www.lischer.ch)

Fragen Sie uns **ALLES!**  
....wir sind für Sie da!

Auch im Schadenfall lässt  
die «Winterthur»  
keine Misstöne aufkommen.



### Restaurant Gifthüttli

Schneidergasse 11  
4051 Basel  
Tel. 061 / 261 16 56  
Fax 061 / 261 14 56



trustconsulting  
Richard Madörin & Co  
Dornacherstrasse 86  
Postfach  
4008 Basel  
  
Tel. 061 361 29 24  
Fax 061 361 25 49  
madoerin@trustconsulting.ch

Unternehmensberatung  
Steuerberatung

winterthur

Von uns dürfen Sie mehr erwarten.

Winterthur Versicherungen  
Generalagentur Pratteln  
Kurt Spöri  
Oberematstrasse 33  
4133 Pratteln  
Telefon 061 826 90 40  
Telefax 061 826 90 54


## Dr Bummel 2006

### In de Katakombe vom Joggeli

18 Aktivi und ebbe zwei Dutzend Gescht (Passivi, Miglider vom Stamm) hän sich am 26. März, so um die halber zähni am Morge, im Hotel Basel troffe. Dr Kaffi isch guet gsi (Merci Marcel!), alli hänn d Bummel-Vorfreud gnosse und gwartet, was uff is zuekunnt.



Per Tram sim mer nach St. Jakob disloiert, und dert hänn mer e Fiehrig duur dr inzwische nimme ganz neyi St. Jakob Park (friener s Joggeli) gmacht. Nai, nit s Terzianum, wie s binere Alte Garde aigetlig erwartet worde isch, s richtig Stadion mit de Karakombe, dr Haupttribüne inklusive Loge im dritte Stogg hän mr besichtigt. Dass s Fasnachts-Comité en aigeni Loge het, wo si näbe em Empfang vo Gescht auch über d Subventione würde beroote, isch e Grücht. Zumindesch drait kai Loge e Schild vom Comité.



Noch emene Apéro in der Hattrick-Bar hän die maischte e viertelschtündige Waggel ins Freidorf uff sich gno, bi schönschtem Friegswätter ibrigens, und im Restaurant vom Coop-Bildigszentrum het s e fein Ässe gä. Alles het prächtig klappt, danggscheen em Linus und em Seppi fir d Organisation.

Eppen am vieri sin mer mit dem Tram in d Stadt gfahre, hän is vor em Hotel Basel nomol gschterggt, bis dr Werni am halber sächsi s Zepter ibernoh het. E heerlige Zug sin mer gsi dank der qualitativ und quantitativ erstklassige Verstergig vom Stammverain – dr Werni het gschrählt: Ändlig wieder emool e scheene, grosse Huffe hinter mir!

Piccolo



Dass es noneme Halt bim Schlüssel zuenere Absplitterig ko isch, het sich gli als Grücht usegschteilt. Dank ihrem fasnächtliche Spürsinn vo de Zruggbliebene hänn mr nämlig nach em nägschte Halt bim Storche die letzte zwei Toure wieder im Vollbeschtand absolviert. Und denn am zähni het dr Werni noch em Saggodo abgwungge – d Fasnacht 06 isch ändgiltig verbi gsi.

Manuela Nickler

# Intärns



## Willkommen im Stammverein vom CCB!

In diesem Jahr sind zwei Junggaristen und drei Junggaristinnen in den Stammverein übergetreten. Am Bummel des Stamms wurden die drei jungen Damen herzlich aufgenommen und sie haben mit ihren Piccolos ein Ständeli gegeben. Leider konnten die zwei jungen Männer nicht dabei sein wegen Krankheit. Wir freuen uns auf euch!

### Manuela Nickler

Der Stammverein kennt Manuela bereits seit drei Jahren und einige meinen, sie wäre schon längere Zeit fest im Stamm. Beim Charivariauftritt und bei den Drummeliauftritten war sie bereits dabei. Seit letztem Jahr unterrichtet sie die Anfänger der Jungen Garde, was ihr viel Spass macht. Manuela ist eine sehr gute Pfeiferin, sie hat drei Mal hintereinander den Pokal der Pfeifferkönigin unserer Jungen Garde gewonnen. Sportlich engagiert sie sich beim Volleyball. In die Schule geht sie in Oberwil ans

Gymnasium in die zweite Klasse mit dem Schwerpunkt fach Biochemie. Als späteres Studium könnte sie sich etwas Richtung Chemie oder Medizin vorstellen.

### Seline Grüninger

Zuerst hat Seline bei den Rhyschnooge mit Pfeifen begonnen, wollte dann zum CCB wechseln und ist jetzt seit sieben Jahren dabei. Sie geht ans Gymnasium Oberwil mit dem Schwerpunkt fach Spanisch. Letztes Jahr war sie im Schüleraustausch in Neuseeland. Reisen tut sie gerne. Sie könnte sich einen Beruf im Tourismusbereich oder Journalismus vorstellen. Ihre Hobbys sind Fussball, Volleyball, Velo fahren, Ausgang mit Kollegen.

### Anina Jost

Sie hat mit sieben Jahren bei den Optimisten Pfeifen gelernt, war bei den Spalen dabei, hat dann zwei Jahre keine Fasnacht gemacht. Wegen ihrem Hobby Fussball und der Freundschaft mit Stephanie Bürgin kam Anina zum CCB. Sie geht ans Münster-Gymnasium und steht jetzt vor der Matura mitten in den Prüfungen. Ihr Schwerpunkt fach ist Spanisch. Sie war bereits



### Möbellagerhaus Umzüge

**FLEIG**

Fleig AG  
Postfach  
4006 Basel  
Sternenhostrasse 2  
4153 Reinach  
Fon 061-272 11 11  
Fax 061-272 11 01  
www.fleigumzuege.ch

CCB-Mitglied  
▲ Steuer- und Unternehmensberatung

### DWM VERWALTUNG UND UNTERNEHMENSBERATUNG

DIETER W. MEYER Hardstrasse 126  
CH-4052 Basel  
Telefon 061 313 61 61

Wartenbergstrasse 41, 4020 Basel E-Mail: info@haegi-ag.ch  
Tel. 061/378 88 00, Fax 061/378 88 22 Internet: www.haegi-ag.ch

▲ Buchhaltungen  
▲ Wirtschaftsprüfungen

▲ Liegenschaftsverwaltungen

Hesch gwüssst, ass...

- dr Thommy Mü. s Spaarsäuli vo sym Sohn für s Bier am Drummeli gschlachtet het?
- d Carole Z. am Fasnachtsmäntig akut vo dr Schloofgrangget befalle worde isch?
- d Gaby B. - syt d Carole Z. an dr Fasnacht bi ihre gschloofe het - plötzlig anderscht gschminggt isch?
- dr Oli R. sy Wortschatz verdopplet het und jetzt zwai Wörtli kennt? Hallo! Ade!
- dr Münchnerhof au grossi Zimmer het?
- dr Schorsch J. syt ca. 30 Johr gfroggt wird, ob är nit in die Alt Garde möcht?
- me e Marschiebig au mit Kopflädern mache ka?
- gwüssi Cliquegschpäänlä gärn zueluege, wie ihri Goschdüm-Accessoire baschtlet wärde?
- d Sabine G. drei mol het miesse s Goschdüm verglainere lo, will si bi dr Aaprobs z vyl Pullis montiert het?
- dr Schille e Aug uf d Ursi N. gworfe het, das aber au numme, will si immer Zahnsydye derby het?
- dr Barbara-Käller am zwölfi znacht zue macht?
- dr Marco B. als wie MEER d Gummistüifel azieht zum sy Bier z dringge?
- d Monika L. nit gärn mit em Drämmlli über d Brugg fahrt?
- d Dambuure au ohni Pfiffer singe könne?
- „Nai, kai Neopren! - Jo, s losst duure!“?
- au in Lissabon dr CCB musicalisch aktiv isch?



Dasch e Inserat speziell  
an alli Passive vom CCB  
und Eltere vo dr Junge Garde

Wottsch e Mol aggtiv  
im Stamm vom CCB  
Fasnacht mache  
und als Vorträblerln  
d Fasnacht erlääbe?

Prächtig!

Mäld Di äifach bim Obmaa Guido Jäggi  
Delifon 076 491 96 06



## VERMIETUNG

von Büro- und Lagerräumlichkeiten  
im Industrieviertel Dreispitz  
in bester verkehrstechnischer Lage  
sowohl strassen- und schienemässig  
erschlossen

## DIENSTLEISTUNGEN U.A.

- Warenlagerung Inland und unter Zollkontrolle
- Bemusterung, Sortierung und Neutralisieren
- Kommissionieren etc.

Hesch gwissst, ass d **Basler Freilager AG**  
dr grossi Sponsor isch vom CCB?  
Au gheert si nit grad zue de Maagere,  
denn si duet uns're Grimbbel laagere!  
Und sottisch irgend ebbis von're ha,  
so zeegere nit lang und lyt schnäll aa!

# Die Letscht

CCB Zytig Nr. 228

Sytte 20

## Agända

| Datum        | Stammverein  | Alti Garde                               | Jungi Garde   |
|--------------|--|--|---|
| 04.05.06     | Aggtive-Sitzig bzw. aggtivi<br>Spiil-Sitzig<br>(20.15 DVD-Käller)  | „Pfyffe mit Felix“<br>(20.00 CCB-Käller) |   |
| 11.05.06     | CCB-Vorstellig Baseldytschi Bihni: „Dr Neurose-Kavalier“<br>(20.15 Käller-Theater im Lohnhof. Ab 19.30 kasch an dr Bar no aine schnabbe) |  |   |
| 17.05.06     |  |  | Elternabend (20.15 CCB-Käller, Uff dr Lyss 20, Basel)   |
| 18.05.06     |  | „Pfyffe mit Felix“<br>(20.00 CCB-Käller) |   |
| 18.05.06     | Summer-Stamm (20.15 Hotel Basel)   |  |   |
| 9.6.–9.7.06  | CCB-WM-Studio (Restaurant Sperber, Hotel Basel)  |  |   |
| 15.06.06     | Generalversammlung (20.15 „Mohreloch“, 2. UG, Klybeckstrooss 15, Basel)  |  |   |
| 17.+18.06.06 | Clique Grimpeli<br>(Sandgruben-Areal)  |  |   |
| 22.06.06     |  | „Pfyffe mit Felix“<br>(20.00 CCB-Käller) |   |
| 22.06.06     | Summer-Stamm (WM-Match Japan – Brasilien;<br>20.15 Restaurant Sperber, Hotel Basel)  |  |   |
| 29.06.06     |  |  | Hotdog-Yebig<br>(19.00 – 21.00)                         |
| 29.6.–2.7.06 | Eidgenössisches Tambouren- und Pfeiferfest (inkl. CCB-Fescht-Bäiz)   |  |   |
| 06.07.06     | „Pfyffe mit Rita“ (alli, freiwillig, 19.00 CCB-Käller, Uff dr Lyss 20, Basel)  |  |   |
| 13.07.06     | „Pfyffe mit Rita“ (alli, freiwillig, 19.00 CCB-Käller, Uff dr Lyss 20, Basel)  |  |   |
| 20.07.06     | „Pfyffe mit Rita“ (alli, freiwillig, 19.00 CCB-Käller, Uff dr Lyss 20, Basel)  |  |   |
| 20.07.06     | Summer-Stamm (20.15 Hotel Basel)   |  |   |
| 26.–29.07.06 | Basel Tattoo 2006 (Kasernenareal)  |  |   |
| 27.07.06     | „Pfyffe mit Rita“ (alli, freiwillig, 19.00 CCB-Käller, Uff dr Lyss 20, Basel)  |  |   |
| 03.08.06     | „Pfyffe mit Rita“ (alli, freiwillig, 19.00 CCB-Käller, Uff dr Lyss 20, Basel)  |  |   |
| 10.08.06     | Summer-Blausch   |  |   |
| 17.08.06     | Yebigsafang obliga-<br>doorisch (20.15<br>Kohlenbergschulhaus)   | „Pfyffe mit Felix“<br>(20.00 CCB-Käller) | Grill-Blausch in dr G80<br>(18.00 Restaurant Seegarten) |
| 18.08.06     | „Em Bebbi sy Jazz“ (mit dr CCB-Cüpli-Bar ab 18.00 vor em Hotel Basel)  |  |   |
| 07.09.06     | Käller-Stamm (21.30 CCB-<br>Käller; noo dr Yebig)  | „Pfyffe mit Felix“<br>(20.00 CCB-Käller) |   |
| 23.09.06     |  | Herbscht-Bummel                          |   |
| 16.+17.09.06 |  |  | Weekend   |

**S'isch allewyyl “Fasnachts-Zyt”  
im Hotel Basel.**



**Basler Keller · Münz · Sperber – Gastlich und freundlich.**

am Spalenberg · Münzgasse 12 · CH-4051 Basel Telefon 061/264 68 00 · Fax 061/264 68 11